

四庫全書

集部

欽定四庫全書

集部
荆川集卷三

詳校官監察御史_臣曹坦

中書_臣劉源溥覆勘

總校官進士_臣繆琪

校對官中書_臣范來宗

謄錄監生_臣邵士深

欽定四庫全書

荆川集卷三

詩

明 唐順之 撰

自述

此下係後
家居時作

祇為抽簪早歸來，已四春本非食肉相。猶是飯牛身負郭，
無新業灌園有舊鄰。磯邊獨釣客隴上，偶耕人相見。
一相笑，吾今罷問津。

宿游塘書懷二首

脉脉常多病
睢睢竟寡諧
鸞鳩知分量
槁木任形骸
蟲語喧清夜
藤花媚小齋
逃虛何足嘆
心迹幸無乖
雨過草木好
夜來池館清
露蟲疑燭影
風樹答書聲
似瓠甘無用
為羶厭有名
且師河上叟
毋使慮營營

題陳渡莊

經時不到此
花落徧庭蕪
開館猶如客
憑軒忽喪吾
蝶飛看栩栩
鳥喚聽烏烏
便欲題丘壑
於今總姓愚

山亭遇盜次韻

枕書覺已倦，挺劍忽相求。
驚起游仙夢，虛疑賈客舟。
齋糧十日少，載橐一身浮。
澹泊堪為笑，將何謝爾偷。

病中試新茶

久不窺園圃，多應徧落花。
生涯只本草，歲月又新茶。
婚嫁身多債，詩書眼尚遮。
病來都忘却，恰似老僧伽。

泊舟郭外有感

時旱
灾甚

愁多番夜短，村郭又雞鳴。
更聽鄰舟語，行看海日生。
新

秋河漢影竟夕枯槔聲誰能訟風伯一使甘霖傾

同褚生滔徐生大復夜過城濠水榭作二首

出郭卽山家孤亭更水涯人開池上酌蓮吐月中花清

籟微微至明河漸漸斜坐疑塵世隔雞犬亦無譁

祇堪成獨往詎意得同羣柳色秋將近烏啼夜欲分細

吟西澗草間誦北山文縱然逢醉尉不是故將軍

時居人有

者
訶問

游永慶寺示諸友

村墟正三月春服領春風飛鳥機心外青天佛眼中觀
心猶是障齊物亦非同何處叅真訣顏生昔屢空

題金山寺付僧惠傑四首

何處尋龍藏停橈聽梵音中流一塔影遠樹萬家陰僧
定潮來去月明江淺深試將空水相堪比慧公心

隱隱帆檣外分明見法幢川光孤斷石井脉割寒江折
葦僧歸渡觀潮客倚窓一窺龍女偈坐使戰心降

憑虛聊騁望面面荻蘆秋坐據三生石心隨萬里流龜

鼉爭出沒樓館定沉浮向夕煙氛歛珠光似可求
法界元無著寥寥空水雲鐘聲潮外住佛相鏡中分經
為魚龍設人將鶴鶴羣慈航如可借不厭往來勤

登常山山亭次壁間韻二首

關通百粵會地帶上游雄車馬年年客塵埃滾滾中憂
時譏喪狗逃世托冥鴻出處將誰是徒令懷古風
平生好奇士撫景氣還雄棧度盤蛇際灘行磨蟻中客
心南北水世事去來鴻聞說仙山近冷然欲馭風

過清溪莊值主人不在

岸岸夾叢竹清溪幾許深
君從城市隱余向碧山尋
翳翳孤村景刁刁衆木吟
還看題壁字想見閉關心

題清溪莊三首贈顧副使

阮生常避俗平子正歸田
種秫供生事為樓佇列仙
沙行隨鷺跡湖泛趁漁船
月下聞高咏應多感興篇

城郭往來久獨憐湖上居
素封千樹橘白首一牀書
山客秋分蜜溪忙夜捕魚
橫金豈不貴此樂復何如

地即梁鴻宅溪連范蠡湖霜天榮橘柚秋水戲鷗鳬從
宦元非巧名丘亦是愚欣君遂始願遶屋樹枌榆

贈王山人

自笑久磷緇還真已是遲偶尋赤松子更結白雲期短
褐身將老微言世莫知吾生同智北從此問無為

贈山陰陳千戶病卧毘陵三首

陳故毘陵人也

問子來何處云從剡水陰越吟多病客吳語故鄉心尺
牘人爭羨一言余所欽由來絕絃意今日為知音

到處能驚座知君是姓陳小言工作賦大隱不違親倒
篋酬寒士投書絕貴人吾將從汝去共醉若耶春
高牙將門子何事老蓬蒿坦蕩從吾好浮沉任所遭行
窮五名岳家住一漁舸尚覺雄心在逢人脫寶刀

周蓮渠以詩問病次韻

詩書能作崇齒髮自多愁且效漆園放還同蓮社投耒
材非世用藥石拙身謀脉脉淹時序空貽知己憂

載疊前韻二首贈蓮渠

十年不入市一飲復何愁
秘錄時堪展華簪久已投
只
有歸田賦曾無問舍謀
營營憐俗子得失盡成憂

字許門生問詩從海上求
養真人伴鶴寄傲屋如舟
得
喪驚蕉夢榮華覺梗浮
邑中有耆舊應使俗回偷

贈郡倅綱運

之子從王事秋江曉問津
泛舟千里役行篋一官貧
淮
海雄畿服瑤琨貢國珍
聖明如有問正可繪流民

時江南旱甚

送人赴真定幕

幕下繡鞍來滹沱冰未開股肱稱大郡帷幄選名才鴈
起分秦塞雀棲辨魏臺雲山自可樂况得庾公陪

贈馮午山提學

吳俗今應變楚材昔共聞試看鑄人術豈尚雕蟲文
馬迴江樹絃歌散海雲史書徵德化更是一馮君

漢史大馮

君小馮君政如
魯衛德化均

贈吳賓湖

幽棲謝俗客相對只清湖野服裁芳芟時蔬剪綠蒲行

吟向漁父著論比潛夫前洲雙白鳥識得主人無

題徐君淵泉號

磊磊長髯客人間久避名獨因南澗賞遂與北山盟流
處玉琴響繞來茅屋清風流堪此地今古一徐生

贈王思東號

王君祖
為中舍

以茲百年感東望一畝廬氏族王孫後弓裘世澤餘時
攀臯上樹獨對齋中書尚說傳奇字知君辯魯魚

贈熊南沙郡倅入賀萬壽節三首

去去朝元使先年漢署郎遙將華封祝再惹御爐香近
侍陳鴻寶仙人捧御床試看舊朋輩多在珥貂行

畫省何年別頻驚江上楓因茲萬里會還向五雲宮恩
承天語潤班許近臣同自信真心在羞言藉子公

一朝辭寵辱終歲事沉冥只可羣麋鹿那能出戶庭北
邊頻候月南紀正占星

時大
守斗

長策須君輩將何獻帝庭

壬子陸生南陽褚生滔赴試與之叙別不覺坐

至夜分因作二首

齒長愧一日經傳在兩生攝衣常共席連茹亦同征夜
露澄杯氣秋河澹月明忘言吾已久款款見深情

汨沒嗟來久前儒與後生爭矜腐鼠得誰逐冥鴻征默

坐蛩秋語窺書螢夜明舊游看籍湜應悉此時情

韓子
云籍

湜輩屢指教
能不叛去否

常山懷羅念菴

本為窮幽賞非因避世氛鄉心吳水盡客路粵山分名
姓休相問漁樵久作羣忽思鸞掖侶日暮倚停雲

壽詩

早謝浮名絆生涯常宴如春來江上棹老去枕中書東
郭閒居慣南榮世慮疎看君足道貌自與俗人殊

董進齋壽詩

自愛懸車早經今十歲餘薄遊滄海客大隱市城居坐
閱人間世時翻肘後書里中問耆舊羨爾更誰如

蔡南村壽詩

蔡泰伯里人羸之父

我識南村叟矍然一逸民卜居三讓里擊壤百年身城

府入來少桑麻樂處真一經今有子環堵豈嫌貧

壽王生革母

之子門生秀傳經契獨深還因飲冰志更識和丸心貧
供江水饌詩獻柏舟吟古來推善養尹母復如今

壽慕菴六十

父 釴之

家世法真餘清名人不如高年推亥字大隱寄廬居逸
客閒相過機心老更疎多君能教子餘慶在詩書

贈徐學琴六十

大復 之父

改歲周正月推年絳老人山田新刈林茅屋久藏珍白雪絃中意青衫物外身羸金亦何羨有子不為貧

題孤山林隱居祠二首

孤山春欲半猶及見梅花笑踏王孫草言尋處士家塵心瑩水鏡野服映山霞岩壑長如此榮名豈足誇

碧水年年色幽人復此遊不因同所好那得獨相求山鳥矜春語湖煙淡夕流思君忽自笑信矣一生浮

岳將軍墓

國恥猶未雪身危亦自甘九原人不返萬壑氣長寒豈
恨藏弓早終知借劍難吾生非壯士於此髮衝冠

吳江三忠祠

祠在太湖東畔三忠伍太
宰張睢陽岳武穆也

廟枕洞庭波招魂薦楚歌靈風鼠雀避落日鹿麋過東
國終為沼南兵不渡河江淮形勝地保障近如何

一日屬鏤賜千年墓櫓秋死應為厲鬼戰豈覓封侯吳
越車書混江淮戰伐休幸逢全盛世此地弄扁舟

松關

蘇南雜詩為吳
順山副使作

月出照松闕松陰正滿地恐有山僧歸終夜不須閉

梅塢

層冰結平川積雪埋高樹無處寄幽情但到梅花塢

筠徑

面面隔深竹茅齋在何處遙聞犬吠聲試從此路去

石丈

自是太古人一身衣百草年年只在山憐爾亦枯槁

蒼翠亭

風來松濤生風去松濤罷雖非叅禪客暫此學觀化

會遠樓

層樓對迴溪溪邊草新綠不是傷春人聊騁千里目

元陽洞

混沌遇儵忽誤被鑿一竅寄語談玄人此中可觀妙

小虹橋

採花與汲澗幽事俱在山朝向橋上去暮向橋上還

迎仙館

空齋寂無人草木自森蔚不因羽客遊安得有雲氣

禮星臺

昔在明光宮日侍北斗傍此時卧空谷頻望北斗光

靈芬精舍

山人愛長生辟穀亦云久何以濟朝饑紫芝大如手

山田

從橫亂峰裏忽此見平田不須抱甕汲自有峰頂泉

山池

百泉自奔注更不費疏鑿雨歇天氣清臨池看洗鶴

茅亭

孤亭簇羣岫宴坐增悄然主人何所作多應草太玄

良友軒竹

里中耆舊多談笑每相聚日暮各自歸此君獨不去

聽鶯閣

春催金谷曉一望百花齊不作遼西夢從渠著意啼

己酉八月十八日觀潮作

秋空忽爾色黯黯萬竅怒號山震盪冥冥混沌一氣來
游人共指潮頭上初時映海色尚微及至摧山力漸壯
瀕洞吳越懼一壑幻戲人獸驚殊狀滿空煙霧走玉龍
萬里川源飜白象雷鼓鞀鞀馮夷舞日車出沒鮫綃漾
海神珍寶不自惜歲與江妃一相餉須臾漲盡勢稍歇
依然宇宙回清亮昔人說此已愈疾何況臨流恣疎放
賀金翁夫婦雙壽詩翁舉人子韶庠生子聲之

父也

金家兄弟早空羣倚馬便作萬言文玉樹輝輝照前後
弱冠英名在人口黌舍同遊愧我先相見每稱吾小友
曾說而翁好避喧隱身西郭如鄉村一生愛誦遠公偈
累歲不識縣令門夫婦齊年人共羨九月開筵對歸鴈
請看二子接翅飛好將文繡作斑衣

題贈喬僉事兼為乃翁封君壽

使君昂藏闕西客弱冠聲名已籍籍著書每欲準盤詰
作賦時能擲金石為郎幾歲歷金華還聞建節度褒斜

錦水秋霜看避馬杜陵春草正思家
君家住近谷口東而翁亦有子真風
游宦勿言親舍遠金牛元自接秦中

希周兄八十

三十年前事未遙兄時鄉杖我垂髫
豈識負劍從長者惟解戲雞逐馬誇
輕蹻三十年後事已更驚看鏡裏白
髭生問兄何為却少壯應是黃金鑄
已成

題偶耕書屋送謝右溪西歸兼柬左溪

長君昔挂西曹冠青楓漠漠滄江寒
少君復謝薇省吏

身世飄飄忽如棄歸來對坐四壁居篋中一卷種樹書
誰言丘壑足枯槁折腰昔日今何如五月黃梅雨茅屋
麥苗滿田蠶上簇童稚欣欣笑相語但免饑寒百事足
吳國樗生少好游三仕無成感四休已道栖栖非我事
將從沮溺問良謀

題夏中書畫竹

古來畫竹多少人葉葉枝枝轉成幅獨有中書似老文
解道胸中有成竹辛苦欲得此君意屢歲清齋斷葷肉

偶然興到始一灑萬壑寒聲忽滿屋秋殺春生併一時
幾株抽葉幾株禿披紛蛇虺爭屈伸數寸已覺千尋足
中書醉墨滿人間此幅風神更不俗勸君風雨好收拾
葛陂恐與蛟龍逐

卓小仙草書歌

莆守寄我卓仙書北窓閒佇時玩展吳人本慣見龍蛇
對此真形驚走轉環譎東海黃公符蒼古太廟姬王琬
曲處素娥歌舞腰勁來壯夫縱狼銑藤纏老樹千尺挂

鷹攫寒厓百鳥悞已覺人間出草聖却訝空中墮雲篆
古來草聖誰擅場酒旭僧素頗中選漏痕釵股那足奇
脫帽露頂定漫衍雖然奔放不可羈筆墨蹊徑未盡遣
傳聞卓仙形貌異蓬頭濶口足爪跣胸中光怪秘不得
漏洩機緘在此卷軒轅道士罵俗書寫出靈文世不辨
卓仙作字不用手唐生識字亦非眼說到手眼兩忘處
作者識者俱一莞幾時杖策入武夷試問仙郎叩金簡

楊教師鎗歌

老楊自是關東客短衣長軀衆紅面千里隨身丈八矛
到處尋人鬪輕健謂余儒生頗好武一揖滾滾發雄辯
坐驚平地起波濤蠕蠕龍蛇手中現撥開雙龍分海嬉
攢簇兩蛇合穴戰爭先儘教使機關縮退誰知賣破綻
目上中眉左傳事猶自哂綿中裏鍤那能見滿身護著不
通風百步攏來激流電飛上落下九點九放去收回一
條線問君何為技至此使我憑軒神眊眩答言少小傳
授時五步七步畫地踐邇來操弄三十年渾身化作枯

樹幹心却忘手手忘鎗眼前只見天花旋乃知熟處是
通神解牛斲輪安足羨因君亦解草書訣君鎗豈讓公
孫劍

古鏡歌

瞿翰林來自汴
西亭王孫寄此

美人昔日開匣時兩面含嬌自矜戲一朝委世拋珠玉
獨殉此物不忍離埋沒土中幾何年大塊為工再鑪鞴
砂精承火日夜蒸噴作丹朱滿身瘕中凝一點秋露珠
宿世銅胎盡銷棄有如鍊骨老臞仙血肉都捐祇靈氣

神物安能久藏匿化作白蜺躍出地銀鏤細細髮髭縈
瓜皮津津流水清山人何處得此寶王孫遠自夷門寄
良工為我重開闢一鈎剖出千齡閱初時混沌蟠玄黃
倏忽晦明分面背清輝逼人心髓寒驚詫蟾蜍墮簷際
却憶朝朝鏡裏人已謂衰容止如是今朝覽鏡咄自驚
短髮絲絲見凋敝濕灰餘色轉分明皺縠新紋大髣髴
雲臺勲業已如夢名山著書安可冀本欣始識真面目
回首壯心一憔悴照罷還如未照時好醜依然都不記

我眉道人拳歌

浮屠善幻多技能少林拳法世罕有道人更自出新奇
乃是深山白猿授是日茆堂秋氣高霜薄風微靜枯柳
忽然豎髮一頓足崖石迸裂驚砂走去來星女擲靈梭
夭矯天魔翻翠袖訕談含沙鬼戲人髻鬢磨牙臂捕獸
形人自詫我無形或將跟絰示之肘險中呈巧衆盡驚
拙裏藏機人莫究漢京尋橦未趨捷海國眩人空抖擻
番身直指日車停縮首斜鑽鍼眼透百折連腰盡無骨

一撒通身皆是手猶言技癢試賈勇低蹲更作獅子吼
興闌顧影却自惜肯使天機俱洩漏餘奇未竟已收場
鼻息無聲神氣守道人變化固不測跳上蒲團如木偶

日本刀歌

有客贈我日本刀魚鬚作靶青絲綆重重碧海浮渡來
身上龍文雜藻荇悵然提刀起四顧白日高高天罔罔
毛髮凜冽生雞皮坐失炎蒸日方永聞道倭夷初鑄成
幾歲埋藏擲深井日淘月煉火氣盡一片凝冰鬪清冷

持此月中斫桂樹顧兔應如避光景倭夷塗刀用人血
至今班點誰能整精靈長與刀相隨清宵恍見夷鬼影
邇來邊圉頗驕黠昨夜三關又聞警誰能將此奠龍沙
邊氓萬戶忻安枕古來神物用有時且向囊中試韜穎

劒井行

時有白
氣屬天

仙人擲劒不記年至今光怪猶未歇薄蝕日月騰金晶
青天倒挂雙白蜺曾斬妖蛟帶腥氣寒泉滿甃誰敢汲
只恐仙人求故物但看水底飛霹靂

陳渡草堂二首

皂衣非復漢庭郎，敝縕深冬卧草堂。
貧薄不羞畜牯計，沉浮也逐鬪雞行。
殘書閣盡經旬病，異味嘗來百草香。
獨愧頑心猶未化，十年學道幾亡羊。

近市偏逢食有魚，閉門不問出無車。
牛衣聊自對妻子，蜡酒時將洽里閭。
世網幸疎如野馬，微名猶在愧山樗。
亦知農圃真吾事，春至頻翻種樹書。

小樓宴坐

不入名山不世間
嗒然隱几置遺編
身名瓦礫宜居後
人事蚊蚋任過前
抱樹蛻蟬司化運
隔窓風竹發真詮
未登道域終難罷
微管還須學測天

涉世已如入夢蝶
居身未作脫鞵鷹
自疑戾契

戾契見韓文俗

呼振及

終為病欲學墨尿

墨尿見列子俗呼眉西

又不能金老相逢

知法器慈公頗訝似禪僧
牛乎馬也從人喚
惟一迂儒是本稱

嘉興金道士三十年不下牀
亦三十年不開口
冬夏

一絮被自擁余叩之以指畫卓許余入道慈舟者蘇
之名僧也余見之不告以姓名渠深嘆異以余為頭
陀相也

又疊前韻

到處迷陽不記年村中歷本逐時編寒烏滿野成禾後
社燕辭人落木前戒酒劉伶終酒性遣言摩詰亦言詮
青天自是無逃處何事靈均更問天

混合高低齊鸚鵡鳳經過老少變鳩鷹屈伸禽戲憑何訣

篆刻蟲雕誤謂能盡日閉關非酒聖

文中子稱劉伶古閉關人廿年

猜謎是番僧

余與翠峯僧往來酬對者廿年

此身本自無觔兩月旦先

生若麼稱

莊中作

帶郭頃田屋一尋歸耕自許力能任浮沉
表盎啞驅狗
廉侈王陽訝化金貯麥舊庾將易穀行鞭
新竹漸成林
計然七策皆無用小試經綸底似今

自述

避人不敢厭高深
逃影何如學息陰
楚客又成蕉鹿夢
漆園未了是非心
紛紛世事看花發
默默天機聽鳥吟
可笑維摩真病在
無言說處是金鍼

有相士謂余四十六歲且死者詩以自笑古人
云死生亦大矣此謂趣日力以進道者言之
也苟不進道總是虛生修短何辨焉苟于道
有見處夕死可矣然則死生詎足為大哉

本是癯然山澤士
衰年况自不勝衣
色常帶墨緣辭肉

形或如灰似杜機睢于久謝偕來衆蹇拙何心知我希
世人莫詫方臯眼相馬由來失瘦肥

殤子彭聃誰天壽百骸九竅孰疎親若過顏氏十四歲
便了王孫一裸身三載濫叨金馬客幾人共坐絳紗春
即今已似前生事何待他年跡始陳

人情世事古猶今寂寞空林寄此心賢聖不分聊中酒
虧成忘盡一聞琴有書終日只掩卷無病長年亦擁衿
即使癡然似桑戶未逢點也是知音

學道曾窺天壤意寒儒又是膝攣人只言蔡澤有限壽
誰見壺丘不定身貴客懶迎長謝病薄田可飽敢稱貧
後來不用問修短已占溪山四十春

囊癰卧病作三首

節候經春日日陰寒衿獨擁閉門深終朝鍊液非仙氣
幾歲懸疣是雨淫焦火凝冰鑄瘦骨兒痴女長試灰心
總緣病裏悲歌意不為離鄉也越吟

春半忽驚狗馬疾年來似是龍蛇辰謝醫少錢長卻藥

煖骨累裊聊借人味為補虛一試肉事求如意屢生嗔

正愁未了形骸外生老病苦只此身余平生無厚褥止一褥既薄且敝病

骨覺冷硬不堪也乃從親人家借一褥視之平生有厚褥與重褥自今始而余素戒肉養病乃肉食

頻年喪我几堪隱到處逢人席任爭疣贅勿嫌能侈性

支離番笑足全生野蔬入口勝甘脆病骨先時卜雨晴

苦訝道人長好懶如今懶病果相成濕入病骨覺爽然則晴覺痛楚則陰

雨至矣

瘡病作

跼蹐柳肘盡欣然深隱烏皮也自便金冶由他不由我
狼胡是病亦是天身先辭宦猶中熱衣未經秋已著綿
炎涼反覆須臾事一疾番令悟世緣

小集為人所刻

文學從來本不長隱居辭說半猖狂徒令後世能疑孟
祇覺前身似姓莊玄白何分終覆瓿穀臧奚事總亡羊
從今已息揆天口只著農桑一兩章

靈芝寺同童元功宴坐

湖上高樓縱遠心復沿湖岸過東林身閒似覺煙霞氣
地冷無鐘磬音衣裏寶珠應自信苑中靈草試相尋
坐來忽散千峰雪對爾無言意轉深

登屠翰林仍臺作二首

太史仙臺多勝槩正臨檣李古城東五色雲生知海近
四圍山遠覺天空閒居作賦青春後幾歲鳴絃明月中
不是掖垣同宦侶閉關那許得相逢

一上高臺興不孤望中總總入虛無煙霏春變陰晴氣

草樹天輸海客圖對酒笑將花是伴銷憂誰問土非吾

知君苦厭文園卧此地能令肺病蘇

時屠久卧疾

次人憂旱作

歲歲吳儂事水耕朝朝占雨愁雲輕澤中不聞鳩語合
田際但見龜文生野老舐糠猶自得書生炊桂亦何情
東南生計已如此聞道山西又點兵

再遊清溪莊值主人不在次韻

桃樹臨溪思不禁扁舟重問草堂陰西湖水落黿鼉石

南國霜清橘柚林，壟際流泉宜稻性。
窓前過鹿解人心，憶君剪徑相迎處。
今日蓬蒿又已侵。

至常熟陳中丞白訓導邀登福山看海二首

春早吳山雨半晴，有客邀我觀滄瀛。
澤國冥冥蒸海氣，石灘淺淺鬪江聲。
日月迴旋一島小，小金銀色相十洲明。
微風向夕送清響，應是仙人吹玉笙。

久緣迫隘悲時俗，海嶠春臨思若何。
地湧龍蛇爭起陸，天投星斗橫翻波。
封疆坐攬風濤壯，氣候常看霧雨多。

才謝枚生能作賦觀潮恰對曲江阿

金澤寺中寄松江友人

登湖昨夜雨初霽驟覺春衫寒意多
遠浦草青送歸鴈夕陽潮上生微波
戲窺佛偈翻金字靜卧巖扉掩綠蘿
伊人只在蕪葭外獨對清尊奈爾何

松江金澤寺四首

東南巨浸五湖深古寺維舟正夕陰
客到山僧罷清磬雀喧晴日下高林
夾洲煙火三家市滿目蕪葭萬里心

徙倚不知餘興盡月明還擬聽龍吟

三江抱處勢如環野客探奇住不還一望樓臺疑海上
稍聞雞犬覺人間幸無漁父知名姓且望山僧共閉關
自笑歸來張季子春時蓴菜未堪攀

何年此地開金刹宋代流傳直到今聽法石將山作幻
護經龍與水增深爐煙裊裊知塵性栢樹青青見佛心
可是攀緣渾未盡天花猶自惹衣襟

水國餘寒芳草稀偶隨煙艇問山扉窓中怪石如人立

天際孤帆伴鳥飛
高齋盡日逢僧語
短褐經春換客衣
吳江亦是垂綸地
笑指星文愧少微

天寧寺塵外樓四首

瞰郭樓臺誰共登
偶携仙客對山僧
林煙渺渺人家盡
堦日微微花氣蒸
浮世閒看飛鳥過
機心不遣白猿騰
平生自笑支離甚
散髮行歌此又曾

名山不用遠攀登
暫借繩牀我亦僧
幾樹鳴禽助禪寂
一簾修竹散炎蒸
捻花不盡心傳妙
對塔嗟將口說騰

俛仰百年成滾滾乾坤隻眼更誰曾

金門十載笑重登歸去仍依白社僧
虛館靜聽宵蟻戰
遠山時見夏雲蒸已甘檮散終年計恥逐鴻冥
萬里騰
為問洛城冠蓋侶鬢毛銷盡得閒曾

閒裏香臺盡日登嘿然一笑又逢僧
衣裁野薜緇塵淨
飯試山精石鼎蒸大士西方談實相
仙人東海說飛騰
人間多少亡羊路一一行來也未曾

題湖上廢寺

禪宮舊枕清湖曲與客尋幽試共登獨樹春深初著蕊
空山行遍不逢僧臺荒曾與施烏食城化徒聞駐鹿乘
惟有松房明月影年年長似為然燈

題龍池菴三首相傳伏虎禪僧開山處山頂有

龍井蜥蜴見則雨

遠遊為訪白雲巖轉盡孤峰路更南龍見小身時出井
虎馴大士舊開菴禪心客思俱潭水古佛寒松共石龕
坐對老僧無一事夜深相與說楞嚴

精廬原寄北山巖新築高齋過嶺南谷窈窕間還密樹
石孤危處更虛菴聽經野鹿頻窺戶宴坐山僧不出龕
客欲逃禪無可醉遠公於酒禁方嚴

霽後嵐光散曉巖望中佳麗盡東南三春蘭蕙堪成畹
千里湖山併在菴馴鴿下時呈佛性飛鷹宿處見僧龕
維摩今日還多病酬答誰將究妙嚴

贈菴中老僧僧解相人術少嘗遊歷江南晚歸

菴中

早從祝髮事棲巖為禮名師每向南

用華嚴事

業淨六根成

慧眼身無一物寄茆菴厨邊引澗寧須汲松下翻經幾
到龕若使焚香能證道前身應說是香巖

嘉靖丁未春余以病客荆溪遂同杭子宣登龍池僧
居嵌巖中如鳥巢梯其門以登值二老僧相對煨笋
遂以笋供余二人因留宿與老僧坐至夜分談說楞
嚴因緣事老僧意甚樸野可愛也明日曉起嵐氣滿
山乾坤如混沌狀堦前竹柏亦在摩蕩中咫尺不可

物色日且午始開霽則諸峰歷歷澄湖隱映樓觀草
樹百里之外若在几前蓋宇宙間晦明不常若此既
午出往石屑石屑兩山夾澗山高百餘仞而澗道僅
闊四五十步人家緣澗以居惟亭午則見日色蓋其
勝又與龍池異觀矣既午飯遂從西霞步入舟意興
悠然如有得也嗚呼此豈可與沉酣聲利者道哉遂
書以貽子宣使藏之

贈黃子晦

故黃教授子

黌舍相逢憶聚星予慚入室爾趨庭子長能繼先人業
王吉曾承博士經萬里風煙還命駕廿年踪跡已如萍
衰顏重感青衿日一笑尊前喜愧并

寄周臺官二首

時余將
往南郡

南臺分署沐恩初官是疇人世業餘龍吐珠璣天地轉
星塗黃赤石甘書泰階平處瞻雲闕玉漏清時直禁廬
應有道人扣闕者試看紫氣近何如

文史元隨供奉間南都祕省更清嚴抄書暗譯西番歷

草奏多陳南極占日下有雲朝紀瑞臺中無事晝垂簾
倘覩少微思處士漁樵已判此生淹

家居喜袁芳洲相過賦此為贈三首

相逢京國最情深休沐歸來每共尋異品對食呈海味
道衣便坐解朝簪迂疎北闕上書日寂寞江潭俟罪心
已分與君成契濶一杯還此幸同斟

憶昔曾同念菴子歲寒訪汝深雪邊別開閒館屏人語
不解朝衣藉草眠琴意相傳中散後玄言每到漆園前

正是江東暮雲處再逢攜手一悽然

四十支離一老夫衰顏恰比列仙臞鑄金不驗身多病
種樹無能圃半蕪長日閉闔聊嘿嘿短衣迎客笑拘拘
知君昔日探玄意定有真詮肯示予

次韻贈薛仲常

山林鍾鼎性俱安官舍寧非在澗槃此日心情真似水
平生臭味本如蘭閱世方臯誰牝牡認真桑戶且衣冠

祇應黃馬

泰泉
溪田

頻來往春日江楓共倚欄

歲暮有懷諸子

歲暮蕭條只自如南州高士久無書

達夫

樗材在野大

何用種髮經年短不梳剡水驚心溪雪後

汝中

隴山飛

夢嶺梅初

景仁

祠郎消息憑誰問萬里昆明是謫居

叔仁

贈張贛州致仕還吳次達夫韻

田園舊在海東頭海上新歸張翰舟種菊不辭三徑晚
採蓴將及五湖秋人情歷盡惟看奕世事忘來獨好樓
剩有著書心尚在知君原不為窮愁

贈宜興王丞次韻

王蒲
州人

官粟還能五斗無年來只是憶樵漁道知戰勝臞猶在
詩為身窮思獨殊耕稼吾非徐孺子才華爾亦阮元瑜
他年更向龍門隱為念江臯一腐儒

答朱刑部士南見寄

清齋偃息灌園餘轉盡春禽又夏初對客不須妨蠟屐
占年常自檢農書六經註脚吾焉敢五岳行踪或可如
宣室正須公等在野人只合掩荒廬

同萬鹿園宿工文菴次韻有贈

何處尋山不厭深
淡煙歸鳥暮鐘音
去家百里訝如客
別爾經年尚此心
宴坐清香滋夜氣
閉門殘雪映寒林
相從一宿應堪覺
機事何須問漢陰

次葉師與諸生講書鐘樓寺聞鐘作

早歲傳經髮已斑
寄身精舍渺人寰
苔邊屨跡堪盈戶
花外鐘聲正掩關
驟覺海潮生靜夜
却隨仙梵響空山
先生嘿嘿隱几坐
試問諸生醒夢間

養病道院忽張君見訪不值奉寄

生涯歲歲藥囊間已息交游亦未閒
土木形骸真覺槁蓬蒿庭院只常開
偶隨道侶學禽戲忽枉高人題鳳還
此夕知君向何處多應弄月卧江灣

答贈胡栢泉

赤囊前日秦邊書皂帽何時掩故廬
鳴劍豈知孤憤切請纓爭笑少年疎
自甘淡泊看松菊恥學浮沉逐里閭
春日黃鸝西澗草憶君歸去淮園初

送郭無錫擢南曹主事

郭侯齊魯推名士暫屈清才綰縣符折獄一言驚老吏
洗心終歲比冰壺南曹已應郎官宿東國常懷仙令鳬
野老殷勤何以贈益崇明德永嘉譽

夜歸陳渡草堂時新與諸子別去有懷二首

野夫也復到城市日暮還尋四壁廬蛩響露餘將入戶
人歸月裏又離居坐憑烏几都忘我起對流螢且廢書
正憶青衿同舍子別來秋興各何如

自擬身名如鄭圃宮環半畝日長扁褐衣頗笑非懷玉
茆屋何因却聚星樹底蟬聲希鼓瑟燈前鳥字一談經
試言吾易將東去未識何人是姓丁

癸卯送仲弟正之赴試

偶因今日送行處尚憶當年聽鹿鳴馬氏白眉占仲子
吳門霜鬢愧難兄秋來一雁寒江影天外三山古帝城
此去騫騰非所羨期無溫飽負平生

己酉送兩弟正之立之赴試

秋水芙蓉映綠衫殷勤送爾到江潭人能鳴世慙三鳳
家有遺經是二南文入妙來無過熟書從疑處更須參
遠遊他日看之子下澤欸段吾已堪

送諸從游應試二首

一壑謀身世所疎幾人相伴此閒居月懸山館談經處
雪壓林臯宴坐餘向來衣鉢吾將付先輩文章子孰如
亦知雅志輕青紫好及明時早上書

幾年山澤共淹留今日公車且見求楊柳扁舟吳苑夕

梧桐雙闕漢京秋清時元不棄寒士白璧誰將笑暗投
都下相逢說論語莫言師授是張侯

送馮子聲赴試

與君硯席辱周旋義理蠶絲每共研穎悟最居德祖後
聲名愧出照鄰前身同槁木甘吾隱賦就凌雲羨爾賢
莫道孫弘曾不遇漢庭推轂在茲年

送褚生滔赴試

久撒臯比絕來往褚生時復款柴門文有波瀾堪得髓

座無笙管只清言客心落葉秋江繞別思平蕪夕鳥翻
此去期君戰勝後歸來正對菊花尊

鄱陽別道友

戶庭不出已多年千里隨君意豁然飲醉或歌還或泣
鬢蓬疑鬼又疑仙詎知衰鳳堪為笑且學塗龜得自全
今日別離何足恨終期共住白雲巔

中秋夜同陳澄江張夢麟城壕泛月

森爽秋逢三五中霜天雲物坐來空河灌百川還小艇

寺藏荒野亦疎鐘客嘯忽聞清唳鴈月圓真訝吐珠龍
疑君與我皆仙骨身世何須更挂胸

和張尚書甬川新修池亭奉母登憩作

聖朝耆舊位登三綵服公餘樂更堪東洛撫師雙玉節
西園奉母一茆菴春暉映處花侵戶冬笋成時竹上簷
聞道閒居新作賦承歡養性此能兼

贈蔣璞山封君

主事宗魯之父

早游鄉校已知名曾與賓興聽鹿鳴修行明經為博士

夏絃春誦課諸生官無鼎食千鍾願老有鄉園十畝情
更笑羸金何所用仙郎作吏比冰清

贈張通政

五湖舟楫是家居篋裏惟携老氏書幾日陸沉門下省
一生心跡海東漁賓常滿座嫌猶少行不齎糧任所如
陽羨山靈相望久獨能無意命巾車

用韻自述

南村北郭任吾居懶散何心更著書小酌或能稱酒隱

直鈎聊復事溪漁童時篆刻堪為笑病後形骸漸不如
若道猖狂今又甚窮途猶自未迴車

壽張通政

蚤耽玄寂謝塵氛身隱猶嫌名可聞自著道衣辭漢闕
因尋仙錄禮茅君行隨勝跡曾無住藏向名山更有文
南國夜來占氣色少微渺渺動江雲

曹霜崖六十

曹生恬之父
舊官御史

道人容色自矜然幾歲江臯躡紫煙謝氏家兒如玉樹

周時柱史是神仙鼎成靈藥方皆驗書貯名山世未傳
懶散自憐蒲柳質相從擬欲學長年

司訓殷龍巖壽詩

文東之父

白頭博士早懸車鳩杖扶身八十餘甲子暗占絳老歲
今文口授伏生書清尊只許通門客隱几何心出里閭
應笑籛金無所用仙郎才藻更誰如

楊醫士六十

衣裁鶴氅鶻為冠數卷方書一草菴絳縣老人知幾歲

太倉仙令却多男不為避人居郭外每因採藥到山南
年來頻訝嬰兒色道術從知宿所探

褚怡閒六十

涵之父

古來仙客說長髯今日髯翁亦是仙家近縣門不識令
身居城郭亦耕田鳩形正可供扶杖亥字還堪紀歲年
共羨高門將有待賢郎文藻更翩翩

贈宜興閔翁八十壽詩

上舍叔
之父

古貌脩然山澤臞力田還是漢人餘久諳汜勝齊民術

閒讀周侯風土書桑榆曖曖隨行徑弟子訢訢與燕居
駟馬從來足憂患羨君身世更何如

周子隱有陽羨風土記

贈天寧寺僧八十

化城東畔駐三乘祝髮從師記昔曾頻著袈裟迎上客
自分齋飯與遊僧談經幾夜窓飛雨削杖先年手種藤
因笑馬鳴身已老欲憑弟子為傳燈

懷竹叔壽詩

叔善畫傳
自乃翁

門傍清溪長自扁陰陰簾竹繞幽庭地偏南郭人堪隱

秋盡東籬菊正馨
笑傲百年惟稼圃
風流兩世擅丹青
不須海上求靈藥
元是江邊老歲星

楊醫士壽詩

東亭先生富道術
隱居城郭似江湖
隨身長挾雙白鹿
入市只懸一玉壺
社中漸覺推前輩
門外從教滿病夫
予亦文園高卧客
年來肺氣為君蘇

喇嘛翠峰老僧輓詩三首

枯木寒巖亦未真
走盤珠子自精神
三食煮乾一生事

翠峰每食糠餅

屢歲齋僧幾萬人鑄冶金容瞻氣象圓通天眼

悟根因

翠峰得師傳天眼訣

欲上伏牛心未了了心應待再來身

不事鑲頭不坐禪揚眉瞬目見雄談淨體髮鬚元不礙

翠峰不去鬚髮

煉心妻妾宿曾叅

翠峰為僧後入俗曾有妻妾者三年

殿壓滄溟

功九仞爐開色相佛千龕

翠峰一生鑄佛造無梁殿于浦陀未成也

年年航

海精誠在垂沒魂還到海南

自愧迂儒厭俗葷每游香室藉思薰別來常似一臂失

用莊子

話久寧容六耳聞人去忽驚函谷展錫飛無復海

東雲憐君鑄佛經千億欲借餘銅一鑄君

錢心漁輓詩

心漁先生不可見尚憶吹簫卧草堂垂綸老作江潭客
得姓元從吳越王貧病一生心自足雲山千里興難忘
更聞治命真堪紀人世空矜石槨藏

讀東坡詩戲作

東坡卒于武進顧塘橋去余家數十步

公詩句句寫胸臆一滴冰成大海翻方臯牝牡無定相
曼倩滑稽有至言掃除李杜芻狗語出入鬼神傀儡門

異代或疑後身在告終此地招其魂

雪詩和蘇韻十首

陰風吹隴麥芽纖歲盡玄冥令更嚴園圃未春先綴蕊
乾坤如海欲生鹽不妨積處堪高卧預想晴來好曝簷
縱是未能堅作玉漸看冰柱已垂尖

大地文章散縞纖小堂風物倍清嚴灑來竹裏迷人徑
積向巖前訝虎鹽但使曉寒欺短褐獨宜夕影泛虛簷
瓊花柳絮皆無用誰擬新詞一鬪尖

寒江我亦弄纖纖
豈是羊裘人姓嚴
履處幸不露足趾
啣餘真覺厭酸鹽
紫雲黃竹千年調
白屋朱門一樣簷
高岫儘教遮蓋盡
物情元自礙孤尖

寒皐白草尚餘纖
墜戶村村似戒嚴
飛舞千峰山吐練
粧成幾樹木蒸鹽

滇蜀有木鹽

病多消渴宜調茗
老已捐書

莫映簷強欲搞毫
追小謝

謝惠連有雪賦

詞鋒久避六朝尖

宛轉素娥腰帶纖
迴颿似應舞節嚴
三冬怪事驚粵客

古語粵人

一夜淒風結解鹽

解地鹽遇風則結

厭說魚羔歡錦

帳思分袂續到窮簷懸軍此日堪乘便誰奪祈連萬仞

尖

李靖因雪
擒頡利

蕭蕭凍樹晚喧鷗門外誰來長者車入夜俄驚千里月
開簾相對滿空花東郭先生猶敝履西關遷客正思家
最憐漁父滄江畔閒倚孤舟獨挺義

一片寒原滿樹鷗幽人掩戶罷柴車聊憑濁酒延春色
試向疎梅問臘花草閣映來書幾卷江城積處月千家
此時忽憶荆溪道雲際雙峰聳玉叉

初看朝采颺金鷄
倏見玄雲隱日車
恰似幻師能作霧
却驚翳眼驟生花
細編暫借簷前影
銀閣常思夢裏家
笑道非鹽亦非白
禪機一指為君義

空城無粟噪饑鴉
陌上紛紛正滿車
積澗暗隨泉並滴
入簾應與筆爭花
芻米驟高新歲價
柴扉旋掃野人家
客來此日須沽酒
梁上青錢那得叉

巢風欲動好占鴉
空裏愁翻百寶車
葱嶺未消阿耨水
珠林忽散髮陀花
故種猶在能禁冷
好客相尋懶卧家

且似瞿曇逃世網雪山跏坐足為義

家僮自野田携黃菊二株至軒中感而有作三

首

曠野陰陰萬木霜誰携數莖到茆堂冷質本非堪競秀
閒情敢謂愛孤芳在野寧辭衆草掩入簾聊作滿庭香
自笑吾生花興少欣然對爾亦相忘

余素不好花見此
不覺有喜意豈真

所謂花之
隱逸者耶

已拚寒谷不須媒讓寵何嫌並朶開花意幽閒當艷麗

天心霜霰是栽培，潯陽逸客薈騰醉。姑射仙人綽約來，寂寞於人誠少用。試將服食制齡顏。

不沾春色也穠纖，小院疎籬秘靚嚴。人比孤花清入聖，天然真味淡非鹽。未須採摘供調藥，為嗅馨香置近簷。落英好護餘根在，來歲還看茁玉尖。

此詩用坡公雪詩韻

海上凱歌贈湯將軍九首

湯侯猿臂猛虎鬚，少小曾窺玄女符。明主親頒手中劍，直交跨海斬天吳。

紛紛盜竊爾何知岸上斫人水上嬉自咤一身都是膽
欲將巨海作潢池

偃旗休角寂無猜百丈樓船泊不開夜半賊營流矢滿
纔驚漢將是飛來

水軍隊隊黃頭郎迎潮直上凌扶桑已知海若先清道
萬里滄波定不揚

海上秋高海氣清營中賈勇競先鳴疊嶼翻旌幟影
驚濤盡作鼓鼙聲

沉船斬馘海為羶潭底潛蛟噴血涎
髑髏帶箭逐波去
可道孫恩是水仙

錦紈愛子亦從軍長鬣蒼頭總策勲
誰奪強王萬金首
帳前齊說小郎君

五千長戟下淮邳自是沙洲命盡時
將軍欲置平戎鼓
須借鯨鯢腹下皮

湯侯以渠賊
王良皮製鼓

捷上彤庭寵數優
詔分玉帶與名裘
麾下偏裨盡稽首
貂蟬笑看出兜牟

南征歌十二首

五嶺烽煙久未平
君王習戰幸昆明
却說將軍多勝算
不須文士請長纓

詔錫彤弓出禁城
良家六郡總從行
將軍舊佩平蠻印
校尉新開橫海營

漢皇有道握黃圖
南粵何知擅一隅
萬里出師將問罪
不因大海富明珠

獨承節鉞控南州
親寵由來冠列侯
昨夜輕寒生幕府

賜衣初著紫貂裘

晴原羽騎簇油幢
繡帽爭先蹋鞠場
不惜千金收猛士
欲將尺組繫名王

月明吹笛武陵川
馬上行人望跼蹐
莫怕炎洲饒毒癘
一冬飛雪淨高天

軍書插羽速星奔
叩轡夷王盡款門
殺氣三秋清瘴海
輕兵一夜襲崑崙

草木千山鼓角風
將軍牧馬夜郎東
靈臺向夕占星色

已報欃槍墮海中

圓合孤城海氣昏紛紛失木泣窮猿何如銜璧歸天闕
幸荷明王不死恩

牂牁南去亂峰連滇海藤江一帶懸縱謂蠻封堪畫地
不知漢將若從天

奏凱歸來拜冕旒霍家襁褓更封侯因風為報南荒外
漢闕方臬越尉頭

千羣椎髻競來王聲教南流盡越裳但使文犀通貢獻

不將銅柱隔封疆

塞下曲贈翁東厓侍郎總制十首

四月旌旂出白狼
千山晴雪照油幢
預知水草軍無乏
試辨風雲陣欲降

三晉連年苦被兵
九重拊髀憶豪英
詔書更不從中御
萬里長城一委卿

詩書禮樂古人風
開闔機鈴又不窮
得一降人如愛子
用三敗將立奇功

山前山後兵馬雄
斧鉞衣裳在掌中
俠士獻刀承賜酒
貴侯免胄為趨風

湟川冰盡水泱泱
堡堡人家喚蒔秧
田中每得鳥獸骨
云是單于舊獵場

君侯生長在炎洲
塞外層冰草木愁
祇憐軍士猶寒色
臘盡轅門不御裘

太師昔日定南荒
親把長纓繫莫王
寄語健兒須自愛
射飛休得近邊牆

邊人謂大
官為太師

畫戟森森清晝閒指揮只是笑談閒收將黃犢教耕去
捕得蒼鷹命縱還

營平謀國最深忠每與公卿見不同但使湟中無牧馬
不須麾下有邊功

青青塞草羽書稀士女鼙眠畜牧肥戲看侍兒呈舞馬
醉邀幕客對彈碁

題贈段紫峰

仙人宿處紫煙孤一片峰陰散玉湖今日隱身城郭裏

閉門常寫廬山圖

秋日書客童君見過賦此為贈

有客扁舟問草廬
窓前梧葉正蕭疎
山人已得忘筌意
不復從君乞異書

題陳推官羅江號二首

高卧曾分白鷺沙
清谿深處採三花
總為徵書出空谷
衣裳猶自染雲霞

三山江畔入雲齊
紫氣千年鎖石堤
便欲學仙從此去

與君同聽夜猿啼

題寶華和尚卷

幻目由來見幻華
飲光何事又拈華
兩華舉似知華客
為有別差無別差

贈王和尚住善卷

偃栢垂蘿古洞春
上人飛錫此何因
非關福地尋仙侶
自向青山認法身

自述贈寫真毛君

津黑尚餘山澤氣委蛇又似列仙臞他年太史徵圖畫
為識乾坤一腐儒

贈周筠臯母七十壽詩

高堂有白髮掩映明春暉七十古來少一陽今又歸
瑶池青鳥狎石室紫芝肥令子能承色還看戲綵衣

送使人歸蜀

蜀吳萬里說殊方總是江流一帶長暫醉瓜州能幾日
乘風忽又過瞿塘

題畫

山空夜靜猿一鳴
磴轉雲深鳥不度
幽人何事長獨棲
只為此中有佳處

廣使廖東雱喪後開所惠地黃酒臨觴慘然

尺書滿篋故人情
想像荒丘宿草生
祇餘此日開尊意
堪作山陽聽笛聲

贈儀真沙君

葭莢蒼蒼水國秋
高樓明月古揚州
二十四橋雲霧裏

看君騎鶴上天遊

贈史君漁沙號

問君何處挂漁蓑予亦垂綸坐綠波他日相逢應一笑
不知若箇得魚多

華補菴三度惠酒而此番所惠參酒者絕清冽
可人雖味甚濃厚而置之杯中淡若無色可
謂嘉品因劇飲至醉遂成口號奉謝三首

磁杯寫畫只疑空秋月寒潭意頗同隱几偶然成獨酌

夜涼白露滿庭中

每甘檮散惟須酒欲補虛羸却藉參
療疾陶生無好飲

舉杯深見故人心

淵明素
療疾

絕無色相傾明水只有馨香藉白茅
此夕飲醇拚一醉
恰如把臂與公交

贈曹星士一江號

春雨蘭陵江草生江流恰與道心清
門前車馬日來往
閒坐江城說子平

自述并贈曹君

少讀陰符恥未工
青山偃仰漸成翁
人間炎冷都忘盡
聽話流年一笑中

曉起觀猫捕鼠

起來隱几坐朝暾
深謝當闕早閉門
簷角偶欣猫捕鼠
反觀尚覺殺心存

贈華君一竹號

華生可徵之父

巖居無俗好惟與此君
知千畝亦何羨一枝聊自怡
迎

風響獨奏照月影相隨願比幽人節貞柯貫四時

補翠峰上人挽詩一首

四大于今已各離屈伸猶復似生時弘景遺顏常不改

翠峯死後四體屈伸如常
陶弘景傳中亦載此事

惠能去路定非迷棺斲速朽

寧辭瓦

翠峯以
瓦棺

身不留名豈用碑亦知繪塑終難像聊

使門徒寄爾思

詠橘杯二首

余過荆溪萬為菴訪余舟中時風雪驟甚欲共飲索

杯不可得乃剖橘作盃劇飲至醉相約各賦詩紀之
客中酒具愁難得戲幻霜柑當羽觴破處何妨鑿混沌
醉來偏覺助馨香古風豈讓匏尊儉佳味何須鬱壘芳
更笑王盃真俗物朱門豪客漫猖狂

天生奇器無人識剖破鴻濛笑我狂醇酎坐令增藥味
碧筒徒爾薦荷香持來或訝成金盞寫滿猶疑是橘漿
靈均若也知茲意楚頌還應記醉鄉

荆川集卷三